

Ni Pangulong
Henry B. Eyring

Unang Manuglaygay
sa Unang Panguluhan



Pagpaambit sang Ebanghelyo Tagipusuon sa Tagipusuon

Ang Dios magapahamtang sang handa nga mga tawo sa alagyan sang Iya mga alagad nga luyag magpaambit sang ebanghelyo. Naeksperiensyahan na ninyo ina sa inyo kaugalingon nga kabuhi. Kon ano kasako ini matabo nagadepende sa paghanda sang inyo hunahuna kag inyo tagipusuon.

May abyan ako nga nagapangamuyo adlaw-adlaw nga makakita sang isa ka tawo nga handa sa pagbaton sang ebanghelyo. Nagadala sia pirme sang kopya sang Libro ni Mormon. Sang gab-i antes sang isa ka malip-ot nga biayahe, nagdesisyon sia nga indi magdala sang kopya kundi sa baylo magdala lang sang kard nga inugpanagtak. Pero sang nagahanda na sia nga maglakat, isa ka espirituhanon nga pagpabatyag ang nag-abot sa iya: "Magdala sang Libro ni Mormon." Nagbutang sia sang isa sa iya bag.

Sang ang isa ka babayi nga iya kilala nagpungko sa tupad niya sa amo nga biayahe, nagpanumdum sia, "Amo na bala ini sia?" Nagpanumdum sia, "Paano ko ihambahal ang parte sa ebanghelyo?"

Sa baylo, ang babayi nagsiling sa iya, "Nagabayad ka sang ika-pulo ukon titling sa inyo simbahan, indi bala?" Nagsabat sia nga nagabayad sia. Naghambal ang babayi nga dapat sia magbayad sang ika-pulo sa iya simbahan

pero wala niya ginahimo ini. Dayon namangkot sia, "Ano ang masugid mo sa akon parte sa Libro ni Mormon?"

Ginpaathag niya nga ang libro isa ka balaan nga kasulatan, isa pa gid ka saksi ni Jesucristo, nga ginlubad sang Propetang si Joseph Smith. Daw sa interesado ang babayi, gani nagkuot sia sa iya bag kag nagsiling, "May nagtulod sa akon nga dal-on ining libro. Siguro para ini sa imo."

Ginsugdan sang babayi ang pagbasa sini. Sa ila pagbulagay, nagsiling ang babayi, "Masugilanay pa gid kita sing parte sini."

Ang indi sarang mahibaloan sang akon abyan—pero nahibaloan *gid* sang Dios—amo nga ang babayi nagapangita sang isa ka simbahan. Nakahibalo ang Dios nga napanilagan sang babayi ang akon abyan kag natingala kon ngaa ang iya simbahan labi nga nagpalipay sa iya. Ang Dios nakahibalo nga mamangkot sia parte sa Libro ni Mormon kag nga mangin handa sia nga matudloan sang mga misyonero. Handa sia. Subong man ang akon abyan. Ikaw kag ako mahimo man mangin handa.

Ang pagpanghanda nga kinahanglanon naton yara sa aton hunahuna kag aton tagipusuon. Ang babayi nakabati kag nakadumdum sang mga pulong parte sa Libro ni Mormon, sa ginpanumbalik nga Simbahan sang Ginuo, kag sa kasuguan nga magbayad sang ika-pulo sa

Dios. Kag nabatyagan niya ang panugod sang pagsaksi sang kamatuoran sa iya tagipusuon.

Ang Ginuo nagsiling nga ipahayag Niya ang kamatuoran sa aton hunahuna kag aton tagipusuon paagi sa Balaan nga Espiritu (tan-awa sa D&C 8:2). Kalabanan sang mga tawo nga inyo masugata may mga panugod na sang sinang mga pagpanghanda. Nakabati ukon nakabasa na sila parte sa Dios kag sa Iya pulong. Kon ang ilia mga tagipusuon hustohan ang kahumok, nakabatyag sila, bisan daw ano kahinay, sang pagkompirma sang kamatuoran.

Ang babayi handa na. Amo man ang akon abyán, ang Santo sa Ulihing Adlaw nga nakatuon sang Libro ni Mormon. Nakabatyag sia sang panaksihon ukon testimonya nga ini matuod, kag ginbaton niya ang pagpabatyag gikan sa Espiritu nga magdala sang kopya. Handa sia sa iya hunahuna kag iya tagipusuon.

Ginahanda sang Dios ang mga tawo nga magbaton sang inyo panaksihon sang ginpanumbalik nga kamatuoran. Ginapangayo Niya ang inyo pagtuo kag dayon ang inyo pagbuhat nga ipaambit nga wala'y kahadlok ang kon ano ang nangin tuman ka importante sa inyo kag sa inyo mga ginapalangga.

Maghanda nga magpaambit paagi sa pagpuno sang inyo panghunahuna adlaw-adlaw sang mga kamatuoran sang ebanghelyo. Sa inyo pagtuman sang mga kasuguan kag pagtuman sang inyo mga kasugtanan, mabatyan ninyo ang panaksihon sang Espiritu kag mas dako nga pagpalangga sang Manluluwas sa inyo kag sa inyo mga masugata.

Kon himuong ninyo ang inyo bahin, mas dugang ninyo nga maangkon ang matam-is nga eksperiensya nga makakita sang mga tawo nga handa mamati sa inyo panaksihon sang kamatuoran—nga ginatanyag tagipusuon sa tagipusuon, halin sa inyo pakadto sa ilia.

PAGTUDLO GIKAN SA SINING MENSAHE

Binagbinaga nga basahon ang mensahe upod sa pamilya kag hambalan ang parapo antes-sa-katapusan, nga sa diin si Pangulong Eyring nagahambil part sa mga pamaagi sa pagpabakod sang panaksihon sang isa ka tawo. Hambali upod sa pamilya ang kaimportante sang pagpabutyag sang panaksihon kon nagapaambit sang ebanghelyo. Ayhan makabulig sa kabataan sa

pamilya ang pagdrama-drama kon paano magpabutyag sang panaksihon sa mga abyán.

LAMHARON

Paghibalo kon Ano ang Ihambal

Kon nagabatyag kamo nga indi masyado ang inyo nahibaloan parte sa ebanghelyo agud ipaambit ini sa iban, mag-angkon sang kaumpawan sa sining mga promisa gikan sa balaan nga mga kasulatan:

"Ibayaw ang inyo mga tingug sa sining katawhan; ihambal ang mga hunahuna nga ibutang Ko sa inyo mga tagipusuon, kag indi kamo maligban sa atubang sang mga tawo;

"Kay ihatag ina sa inyo sa husto nga oras, huo, sa sina mismo nga tion, kon ano ang inyo ihambal" (D&C 100:5–6).

"Ang Mananabang, ang Espiritu Santo, nga ipadala sang Amay sa akon ngalan, magatudlo sia sa inyo sang tanan nga butang, kag magapahanumdum sa inyo sang tanan nga akon ginsiling sa inyo." (Juan 14:26)

Dalagko ini nga mga promisa, pero agud maagom ang mga ini, kinahanglan naton himuong ang aton bahin. Sa sining mensahe, si Pangulong Eyring nagtudlo sa aton kon paano: "Maghanda sa pagpaambit [sang ebanghelyo] paagi sa pagpuno sang inyo hunahuna adlaw-adlaw sang mga kamatuoran sang ebanghelyo." Ano ang sarang ninyo mahimo agud pun-an ang inyo hunahuna sang mga kamatuoran sang ebanghelyo?

MGA KABATAAN

Maghanda sa Pagpaambit

Si Pangulong Eyring nagasiling nga isa ka importante nga paagi sa paghanda agud magpaambit sang ebanghelyo amo ang pagpuno sang aton mga hunahuna sang mga kamatuoran sang ebanghelyo. Ano ang pila sang mga butang nga sarang ninyo mahimo agud maghanda sa pagpaambit?



Pinasahi nga mga Panginahanglan kag Pag-alagad nga Ginahatag

Tun-i ining materyal sing mainampuon kag, kon nagakabagay, hambali ini upod sang mga sisters nga inyo ginabisita. Gamita ang mga pamangkot agud buligan kamo sa pagpabakod sang inyo mga sisters kag himuong ang Relief Society nga aktibo nga babin sang inyo mismo kabuhi.

“Ang panginahanglan sang iban yara gid pirme,” siling ni Pangulong Thomas S. Monson, “kag ang tagsa sa aton may mahimo agud buligan ang isa ka tawo. . . . Kay luwas lang kon mag-alagad kita sing ma-id-id sa iban sa bagay nga ginapahigad naton ang aton mga problema, diutay lang gid ang kapuslanan sang aton kaugalingon nga mga kabuhi.”¹

Bilang mga visiting teachers sinsero naton nga makilala kag mapalangga ang tagsa ka sister nga aton ginabisitahan. Ang pag-alagad sa aton mga ginabisitahan natural na lang nga magaabot gikan sa aton pagpalangga para sa ila (tan-awa sa Juan 13:34–35).

Paano naton mahibaloan ang espirituhanon kag temporal nga mga panginahanglan sang aton mga sisters agud makahatag kita sang pag-alagad kon ini ginakinahanglan? Bilang mga visiting teachers, may kinamatarong kita sa pagbaton sang inspirasyon kon magpangamuyo kita parte sa aton mga ginabisitahan.

Ang pagpadayon sang tayuyon nga pagpakig-angot sa aton mga sisters importante man. Ang personal nga mga pagbisita, mga tawag sa telepono, mensahe sang pagpaisog,

mga e-mails, pagtupad sa iya, sinsero nga pagdayaw, pagpakig-abyan sa iya sa simbahan, pagbulig sa iya sa tion sang pagbalatian ukon panginahanglan, kag iban pa nga mga buhat sang pag-alagad tanan nagabulig sa aton sa pagbantay kag pagpabakod sang tagsa-tagsa.²

Ang mga visiting teachers gina-pangabay sa pagreport sang kahim-tangan, bisan ano nga pinasahi nga panginahanglan sang mga sisters, kag sang pag-alagad nga ginahatag sa ila. Ining mga sahi sang report kag ang aton pag-alagad sa aton mga sisters nagabulig sa aton sa pagpakita sang aton pagkedisipulo.³

Gikan sa Balaan nga mga Kasulatan

Juan 10:14–16; 3 Nefi 17:7, 9;
Moroni 6:3–4

Gikan sa Aton Kasaysayan

Ang pag-alagad sa tagsa-tagsa ang pirme nangin sentro sang visiting teaching. Paagi sa padayon nga pag-alagad nagadala kita sang kaayo kag pagpakig-abyan nga labaw pa sangsa bulanan nga mga pagbisita. Ang aton pag-ulikid amo ang importante.

“Ang akon handum amo ang magpangabay sa aton mga sisters

nga mag-untat sa pagpalibog parte sa isa ka tawag sa telepono ukon pagbisita kada bulan ukon kada tatlo ka bulan,” siling ni Mary Ellen Smoot, ang ika-13 nga pangabilugan nga pangulo sang Relief Society. Ginpangabay niya kita nga “sa baylo magtutok sa pagsapopo sang lamharon nga mga kalag ukon sang inyo mga kabataan.”⁴

Si Pangulong Spencer W. Kimball (1895–1985) nagpanudlo, “Importante gid nga mag-alagad kita sa isa kag isa sa ginharian.” Pero iya gin-ako nga indi tanan nga pag-alagad kinahanglanon mangin dalayawon kaayo. “Sa masami, ang aton mga buhat sang pag-alagad nagalakip sing simple nga pagpaisog ukon sang paghatag. . . . sang bulig sa ordinaryo nga mga buluhaton,” siling niya, “pero daw ano ka manami nga mga resulta ang sarang maangkon . . . gikan sa magagmay pero kinabut-on nga mga buhat!”⁵

MGA TANDA

- Thomas S. Monson, “What Have I Done for Someone Today?” *Liahona*, Nob. (2009, 85.)
- Tan-awa sa *Handbook 2: Administering the Church* (2010), 9.5.1.
- Tan-awa sa *Handbook 2*, 9.5.4.
- Mary Ellen Smoot, sa *Daughters in My Kingdom: The History and Work of Relief Society* (2011), 117.
- Teachings of Presidents of the Church: Spencer W. Kimball* (2006), 82.

Ano ang Sarang Ko Mahimo?

- 1.** Nagapangayo bala ako sang personal nga inspirasyon agud mahibal-an kon paano masabat ang espirituhanon kag temporal nga mga panginahanglan sang tagsa ka sister nga gintugyan sa akon agud bantayan?
- 2.** Paano ang mga sisters nga akon ginabantayan makahibalo nga nagaulikid ako sa ila kag sa ila mga pamilya?

Para sa dugang nga impormasyon,
mag-log on sa reliefsociety.lds.org.